

## KENYATAAN MEDIA

### 40 PEMIMPIN MAHASISWA MTUN BERKAMPUNG DI KEMBARA ILMU

12 APRIL - Lebih 40 pemimpin mahasiswa dari Rangkaian Universiti-universiti Teknikal Malaysia (MTUN) berhimpun dan berkampung bagi menyertai Kembara Ilmu yang berlangsung di Universiti Teknikal Malaysia Melaka (UTeM) baru-baru ini.

Program selama lima hari diisi padat dengan perbincangan mengenai Halatuju Universiti MTUN kearah Student Union dan sumbangan Latihan dan Pendidikan Teknikal dan Vokasional (TVET) dan MTUN kepada industri.

Menurut Exco Digital dan Publisiti, Majlis Perwakilan Pelajar (MPP) Universiti Malaysia Perlis (UniMAP) Muhamad Zikry Mohd Zulkaflee, kami berbincang mengenai cadangan dasar-dasar dan rangka yang telah dibentuk oleh setiap universiti terlibat bagi memantapkan struktur organisasi pelajar.

“Selepas perbincangan yang teliti, kami bersetuju Student Union akan menjadi platform kepada pelajar untuk mentadbir sesebuah organisasi mengikut pandangan matang oleh mahasiswa tanpa sebarang campur tangan pihak universiti.

“Malah struktur pentadbiran Student Union di universiti MTUN akan berlainan dengan universiti awam yang lain,” katanya ketika dihubungi.

Tambah beliau, Student Union sepatutnya menjadi sumber utama bagi memastikan ketelusan pentadbiran, integriti dan sikap professional dalam menguruskan hal kewangan dan program-program kebajikan dan aktiviti pelajar.

“Kami juga bersetuju bahawa Student Union boleh dilaksanakan mengikut gerak kerja yang telah dipersetujui melibatkan sembilan orang Jawatankuasa Eksekutif yang mempunyai skop kerja yang berbeza.

“Mereka yang dilantik perlu melalui pelbagai latihan supaya mereka boleh menggendali urusan pentadbiran, kewangan, kebajikan dan prasarana mahasiswa dengan sebaiknya,” katanya.

Ujar beliau lagi, selain berforum mereka juga turut mengadakan perbincangan teliti mengenai sumbangan TVET dan MTUN kepada industry.

“Walaupun banyak input yang diperoleh tetapi dek kesuntukan masa, objektif program tidak dapat dicapai sepenuhnya.

“Namun saya yakin perbincangan ini akan dilanjutkan pada perkampungan mahasiswa di UniMAP pada 12 hingga 14 April 2019 nanti agar lebih banyak input dari pelbagai perspektif dapat diperoleh bagi menambahbaik sistem yang telah sedia ada,” katanya.

Selain UniMAP yang menghantar 26 peserta, kembara ilmu turut disertai oleh dua universiti MTUN lain iaitu Universiti Tun Hussien Onn (UTHM) dengan penyertaan lapan pelajar; dan UTeM dengan 15 pelajar.

Dikeluarkan Oleh :

**Nurul Aida Othman** ([aidaothman@unimap.edu.my](mailto:aidaothman@unimap.edu.my))

**Penolong Pegawai Perhubungan Media UniMAP**

Tel : 04-9798522